



金陵集

啓 箋 狀 外 製 集 內 製 集

卷十二

16  
2323  
3



2323  
12-3

金陵集卷之五目錄



內製集

景慕宮酌獻禮 親祭文

懿陵 親祭文

宗廟夏享大祭 親祭文

景慕宮夏享大祭 親祭文

南壇祈雨 親祭文

真殿酌獻禮 親祭文

明陵 親祭文

宗廟冬享大祭 親祭文

社稷祈穀大祭 親祭文

懿昭墓 親祭文

宣禧墓 親祭文

永禧殿酌獻禮 親祭文

真殿酌獻禮 親祭文

元陵 親祭文

關王廟袞服修改告由祭文

耽羅漢挈山致祭文

三角山祈雨報謝祭文

漢江祈雨報謝祭文

高麗太師姜邯贊致祭文

贈議政府領議政忠愍公林慶業致祭文

贈議政府左贊成忠烈公黃一皓致祭文

故議政府領議政文翼公李秉模致祭文

奎章閣直提學徐鼎修教旨

奎章閣直閣金祖淳教旨

奎章閣直提學徐龍輔教旨

奎章閣待教旨 任秀教旨

教摠戎使鄭民始書

教守禦使金載瓚書

景慕宮祭享樂章文

元子誕降陳賀頒教文

王世子冊封竹冊文

王大妃殿壽躋六旬陳賀頒教文

王大妃殿周甲誕辰陳賀頒教文

惠慶宮寶齡八旬陳賀頒教文

外製集

教咸鏡道觀察使金憲書

教黃海道觀察使李泰永書

教平安道觀察使金載瓚書

教平安道觀察使金勉柱書

金陵集卷之五

宜寧 南公轍 元平 著

內製集

景慕宮酌獻禮 親祭文

於赫 闕宮明靈攸臨歲首祇謁尚有餘忱粵在  
英廟 元良代理堯老舜攝文王世子八域延頸思  
見至治仁聲令聞史不勝記歲巳月寅重逢茲辰俯  
仰今昔愴慕采新 慈壽彌隆慶年又丁略舉菲儀  
少伸微誠追惟乙卯故事是述尚記仰覩恍如昨日  
周旋入戶酒醴其香庶賜降監啓佑無疆



懿陵 親祭文

路出青門劍鳥攸藏有鬱松柏閱幾星霜永惟至德  
於戲可忘光臨五載仁洽八方因心之友保佑 嗣  
王克濟于屯邦錄靈長 聖后從祔象設同岡瞻言  
若臨俛焉增傷夙駕祇謁日吉辰良庶鑑微誠俯歆  
醴香

宗廟夏享大祭 親祭文

維天爲大 祖考則之 聖繼神承武創文治廟德  
觀殷邦錄比姬肅雝對越禴祀孔時何以薦之牲醴  
及養發祥降福洋洋臨茲

景慕宮夏享大祭 親祭文

籩豆旣陳筦磬鏗鏘追惟 寧考慕切羹牆祀無大  
小親薦心香矧今夏禴是月適當豈無其攝莫如躬  
將尚冀降臨錫福洋洋

南壇祈雨 親祭文

於昭四神分授厥職動潤噓鼓時降沛澤今茲之旱  
川澤皆涸一日二日其雨不雨無粒不敗有種皆瘁  
勤苦爲力逝將虛棄豈予自修誠欠對越方行慮囚  
輕重或失予知戒此神宜民恤虞秩殷禱遍走牲幣  
乍霑旋杲月星明霽維彼羣黎上天所遺胡寧忍茲

不終厥施白茅玄圭躬薦明禋雲行雨施庶洽八垠

右風雲雷雨

維岳維瀆爲鎮爲紀功大利博旣流且峙旱魃肆驕  
四野龜坼田無潤土澮絕涓滴濛濛不零炎炎不止  
彼茁者禾舉黃而萎豈予應天或歎實德遇災則警  
過則无惕予方自責神宜憫惻自郊徂 廟靡有不  
禱一霈終闕杲杲愈曝由予否德使民受病率育萬  
姓神維明聖來薦碩牡清酒旣旨佇見大雨方數千  
里

右國內山川

猗彼城隍明神攸宅國有庇依民受其澤旱魃孔熾  
閱月肆虐乍雨旋霽烈陽愈熇顧予爲治政或不節  
宮室其崇民職亦失言路之塞風俗之媮乖氣上干  
召必有由神今怒予移彼赤子忍爲父母立視其死  
民若無食神與有媿載陳周牲自責殷事有興祁祁  
俯冀仰企

右城隍

真殿酌獻禮 親祭文

肅祖在御朝野清平盡性盡倫曰敬曰誠與天地大  
如日月明周籙絲絲文王有聲元良篤生寔荷陰隲

時值仲秋符昔 虹節百五十年復見此慶磐石泰  
山永鞏邦命玉軸展奉 威顏孔邇躬承洞酌展誠  
告喜

右第一室

於戲可忘 英廟之德壽考作人巍蕩立極八旬孺  
慕五紀神功其祥長發流澤無窮鴻運誕啓祚胤永  
錫萬民延頸國本磐石仰惟悅豫 德容如覲既告  
太室又謁 真宮曷罄摹繪堯彩舜瞳冀降遐福俯  
鑑微衷

右第二室

惟天爲大 寧考則之聖作千年將大有爲堯舜孔  
朱以君兼師小子忝嗣若涉冰淵慶荷 祖宗申命  
自天坤闡毓慶冢嗣誕生歡均左海頌騰前星顧後  
無憂拜先有光肅瞻 睟容如在洋洋感極靡逮敬  
薦豆觴

右第三室

明陵 親祭文

皇矣 聖祖純粹剛大體合重乾運撫亨泰學貫天  
人誠徹終始大本既立精義卓爾魑魅遠走巖穴皆  
起發於辭令施諸政事天開日朗雷厲風駛慶流子



孫澤在萬民德無能名命則維新殷祥長發周胤永  
錫綴旒國勢轉爲磐石虹流于渚月在于酉休慶非  
偶若符前後仰惟 祖宗默佑陰騭拜 殿餘慕  
珠邱來謁百年松柏孫枝鬱鬱思齊 二后象設同  
岡周旋入戶如瞻黼裳籩豆旣陳酒醴馨香於昭降  
監啓佑無疆

宗廟冬享大祭 親祭文

於穆 太室陟降如在德以廟觀功則史載受茲投  
遺夙夜履薄仰賴餘庥主鬯有托殷歌長發以承大  
禘貽我燕謨曰篤駿惠節屆冬烝圭幣躬將維萬億

禋旣熾而昌

社稷祈穀大祭 親祭文

國社

自昨秋慶 社稷泰磐厚德攸庇歡均萬民每歲祈  
穀必以上辛錫以大有庶賴明神

后土氏

至哉維后陰功配天哀彼畿湖民方顛連神豈不恤  
由予之愆尚冀冥騭降以豐年

國稷

前年之旱百穀皆病今若不豐柰茲民命司我稼穡

神維仁聖祇薦心昏祝農夫慶

后稷氏

播穀粒民萬世洪休繇瓜之祥今符昔周豐年多稔  
又冀神庥有事首春默祝來秋

懿昭墓 親祭文

粵自在抱已知堯舜令聞日播夙著溫順歲行在庚  
寶甲一周躬來獻竿庶賜歆不

宣禧墓 親祭文

德著崇報慶膺長發 皇考二紀誠慕采切 親心  
爲心來薦芬苾尚冀顧歆永垂佑隲

永禧殿酌獻禮 親祭文

於赫 藝祖聖作東方掃平麗屯神威用張在周爲  
武在殷則湯巍乎功烈啓佑無疆繇繇瓜瓞長發其  
祥有煒 寶幘如覲黼裳時值仲春敬薦豆觴於萬  
斯年降福穰穰

右第一室

光廟中興樹立宏達天與人歸有光前烈身致昇平  
憲章文物有請建閣 聖志未卒因舊命名 寧考  
繼述肅穆黼座符彩映發吉日齋誠躬奠芬苾庶冀  
降歆用昭冥隲

右第二室

於休 章陵厥有盛德毓慶 誕聖奠我 宗祏式  
至于今丕衍靈籙濬哲積累謨貽燕翼名崇追報慶  
荷永錫瞻彼旅楹耿光如覲肆遵舊典祇獻洞酌於  
昭在上尚冀監格

右第三室

皇矣 肅祖光臨四紀道本修齊學闡義理勛華精  
一文武張弛菁莪作成朝多髦士敬讀寶鑑功邁前  
史昨歲拜 陵展誠告喜望就雲日 晬容又邇曷  
不肅雝陳茲簠匭

右第四室

英考臨御五十二年孝友寬儉出於自然文王壽考  
惟堯則天會其有極無黨無偏至化盼饗裕後光前  
昔庚大扎貢獻皆蠲小子何德拯彼顛連七分寓慕  
入戶周旋

右第五室

真殿酌獻禮 親祭文

皇矣 肅廟維天則之道本修齊學懋緝熙大本既  
立治具畢張政先崇儒義大尊王於戲之思百年一  
日 英考寶甲再回歲戌光前啓後采增追慕奠酌

薦誠庶冀歆顧

右第一室

巍巍蕩蕩維我 聖祖協邦侔勛卑宮邁禹孝友寬  
仁出於自然壽考作成五十餘年逮事故老喜說盛  
際天星再周倏逢茲歲來瞻 晬容陳辭薦竿俯鑑  
菲誠降以純嘏

右第二室

於赫 寧考乃聖乃神行格于天功在于人心傳精  
一學貫終始以君兼師精義卓爾全書敬印如讀典  
謨 聖祖舊甲慕切於戲酌獻伸誠癸年是述 威

顏有臨歆此芬苾

右第三室

元陵 親祭文

聖人久道化洽陶鑄五紀神功八旬孺慕運撫亨泰  
會其有極厚澤滲漉均被動植於戲可忘之德之純  
千一毓慶億兆歸仁藐茲寡躬叨承歷服夙宵淵冰  
祇奉烝禴星駕來省歲戌再周松鬱孫枝露濡珠邱  
思齊 聖后禮祔同岡入戶周旋如瞻黼裳念昔仁  
政恤民是先小子何德拯彼顛連耿光雖閔 仙駕  
如臨尚冀庇庥降監菲忱

關王廟衮服修改告由祭文

是有衮衣弊予改為爰因節序虔致告詞

耽羅漢挈山致祭文

遣按覈巡撫試才  
御史沈樂洙宣祭

維南有鎮大嶽毓靈星輝壽躔地控重溟母曰不運  
功利及物渥洼產馬淮海貢橘興雲施雨神所降惠  
海晏河清民所利濟彈丸一島王化愈邈因之飢饉  
遐俗淪薄一視之念王食靡甘千里瀛洲使節于南  
式薦明享敬齋瓣香監茲誠悃垂祐無疆

三角山祈雨報謝祭文

天作高山於赫降神不見運動而利在人屬當南訛

早魃孔熾禮倣虞秩責以殷事一雨三日自丑至卯  
止時方渴未秋若飽匪曰著誠德無不醕茲因節享  
兼薦牲羞

漢江祈雨報謝祭文

因 特教撰進

昔者之旱控于江神謂德在水推類及人惟民時若  
不予遐棄回思舊憂不料今喜雖則後時難望有秋  
惠實神既灾則予由以旬以望似慳似沛益驗於理  
匪無庇賴咎自有歸德豈無報禮雖近文謝有餘禱  
繼茲冥佑洋洋降康肆因節禋兼奠豆觴

高麗太師姜邯贊致祭文

天降豪傑俾濟艱屯不有大難胡施斯人不有斯人  
胡拯斯世麗氏之季綴旒國勢孰其亂臣曰維太師  
太師矯矯功著攘夷契丹猖狂旌旗蔽江王曰忠勇  
天下無雙授以金鉞往鎮西京有歌有泣士女歡迎  
凡公峻庸在寧與慈最厥謨畫尤著襲龜如撲于火  
先去其苦滅其旁延以息中炎如引于水必乘之車  
同其支流以灌于渠旣壯我猷奚恃爾強羣醜悉屏  
軍用翕張滌其污濊養以蠶絲導其狡悍教以書詩  
偉哉天人孰覘其端人免左社功在三韓馬山峩峩  
鴨水湯湯英靈安安長歆苾香義士遺民壇享茲土

尊攘之義撫今思古清曉廟門薦詞侑酒爛彼文星  
光在于牖

贈議政府領議政忠愍公林慶業致祭文

鴨水湯湯西走于燕此去金縉垂二百年賴有將軍  
來食茲土衣冠禮樂興起鼓舞滿人猖獗卿時在灣  
爾以矢去我以帽還手制胡兒如馴鳥雀曰此壯士  
懼不出壁錦州之役卿將舟師樓船候風旗鼓留遲  
都督之箭不鏃而發摠兵之礮不鉛而出登萊一路  
與西海通匣中長劍氣指如虹聞風興者車崔諸子  
酒酣擊筑相送燕市是時東藩天下義聲帝降璽書

獎以忠誠魯連大志諸葛奇謀名炳日月義扶春秋  
風塵未定胡殺壯士從此中原大事去矣猗我列  
祖褒寵既備予尤曠感風泉餘思義士遺民設壇廟  
傍酌以斗酒廣招大荒聽輦之想益激予心忝官致  
侑庶斯顧歆

贈議政府左贊成忠烈公黃一皓致祭文

馬山之阿有儼其祠忠愍血食孰共享之天子陪臣  
曰有忠烈風聲所震山谷猶裂彈丸南城兵匝三旬  
援絕虬蟻勢成魚鱗鄉時奮劍自當一面章京授首  
三軍股戰鄉來龍灣灑泣山川謀復明室登亭誓

天車崔與管同時義士裝送金幣悲歌變徵成敗利  
鈍非所逆知義不帝清萬古有辭詐書抵張彼何爲  
者禍慘館外名動天下鄉視一死如旅得歸端坐胡  
床顏不幾微北鄉辭君南鄉辭母勉勗故人毋奪其  
守千金無賴百身難贖粵我先王屢加褒錄逮予  
興感曰篤不忘曩拜北苑同我冠裳遺裔在庭益激  
予心廟傍設壇事若待今太師將軍同侑苾芬鄉靈  
不昧庶冀來聞

故議政府領議政文翼公李秉模致祭文

大臣之職非才之難惟其任重以識之難不知卿者

稱卿之才跡其平生皆識之推人或紛更自以爲智  
卿有遠見審義與利人以姑息不自爲愧卿所銳意  
事無難易班馬文章器兼剗理卿固有之知則淺耳  
卿昔發軔 寧考初年首登 奎署俄又佐銓隆知  
雅望人莫與前旣自南藩又西而北談笑爲治案無  
留牘遂長本兵旋掌度支盛之文苑仍登台司時維  
盛際卿髮未衰逮予春邸爲賓爲師居然元老國之  
著龜眇予嗣位績用采奮在鼎鹽梅在服藻粉事疑  
而難人皆志志卿爲洪鍾叩之必韻簿書之繁或錯  
而紊卿若湍流決彼焚緼顧惜國體鍊達朝章士當

求學其驗益彰云胡人言如彼惜毒人間綠野龍臥  
干洛自頃以來世運清明赤烏自東朝野仰成懲討  
之義彌綸之誠入告出宣克篤忠貞无妄一疾遽以  
凶告如舟失楫予心驚悼非取文華非取地閭曾不  
利方曾不循物見識力量需用今日 先朝褒教昭  
如日月卿歸在天復侍玉欄殄瘁之思予獨興歎

奎章閣直提學徐鼎修教旨

王若曰閣以奉 聖製倬雲漢昭回于天院以置仙  
僚乃晝晉顧問之地直學尤係遴選宿儒宜處深嚴  
三字特侈於清啣一秩較低於長席制誥素稱蘇內



翰予惟簡心風度能如張九齡人皆屬目龍圖故事  
久稱地比而職親豹直仙班奚但序陞而資歷金華  
黼黻之賁飾顧此任豈不重耶王署銓衡之咸叨伊  
雅望無出右者須體獎擢之眷益勉淬勵之方

奎章閣直閣金祖淳教旨

王若曰設是閣凡十八年居其職可一二計我有爵  
而縻爾豈徒華榮官不備而惟人曾所遴選三清仙  
府古稱內相家人一條冰啣九重西壁峻望睠茲喬  
木之蔭久著判花之譽妙年詞華人皆推燕許手筆  
赫世門閥奚但是王謝風流顧隆眷豈徒然哉而華

啣盖有待也花甄王佩點青瑣之仙班芸閣書香爛  
紅藥之春色

奎章閣直提學徐龍輔教旨

王若曰內閣之設其制作大矣奉先王聖製及予  
御真宸章做宋龍圖皇明文淵而置官凡六員直  
提學則又襲直學士之啣而公革焉蓋極選也規模  
之尊重地處之深嚴而笙鏞黼黻以贊予右文之治  
者比他官尤別故置閣凡十九年予未嘗不倦倦然  
惟恐其失人而及其得人而處之則其喜可知也詩  
曰倬彼雲漢爲章于天言文章之盛也書曰官不必

備惟其人言官難其人也

奎章閣待教李存秀教旨

王若曰文足黼黻可以稱仙卹世掌絲綸始乃叶人望得來妙少年名士自是故丞相肖孫嗟古人尚有典刑在今日尤所感想官逾卑而望逾峻龍圖重南床之選地則比而職則親豹直近西清之列惟人材漸不如古雖其稱塞也難伊官制斟酌于前所以簡畀者重豈徒美其職也尚亦知所勉夫金牌導戴花之遊人皆屬目冰啣侈視草之職予惟簡心

教摠戎使鄭民始書

王若曰惟王公設險必須屏翰之臣非文武全才曷任保釐之責予所注意者將國之大事在戎言念漢北一城實掌畿右諸閫連表裏而藉聲勢南撫隋城之豺貅倚險阻而作保障東爲廣陵之犄角惟其城池之固器械之利甲於諸都所以人民之衆積峙之豐屹爲巨鎮山河壯鎖鑰之形奚但緩急是仗廊廟任機務之責實兼經理諸司顧昔時創設之初雖則形便之可恃逮今日昇平已久柰多紀律之漸踈惟漢制出自九卿徒以得君重也倣周家分治二陝疇能摠予師乎惟卿龍潛受知魚水托契當羣凶煽禍

亂之日一身生死都忘慕古人居功名之規小心謹  
慎自守掌內閣之制誥摠壯營之重務綽乎有餘撤  
南藩之旄節授守使之華啣任無不勝律已則分寸  
皆遵繩墨綜事則毛髮莫非精神况今廟議之僉同  
尤見聲績之素著茲授卿以摠戎使卿其祇服新命  
思懷舊猷樓堞障隍之守備比踈藉卿熟手卒乘田  
屯之制置隨變煩卿息肩士馬鍊習之以時財賦計  
會之必謹明以察奸而錢穀甲兵之無擁虛薄寬以  
御下而賞罰恩威之俱得歡心叅樞密之要務欲藉  
禁中之談兵仗安危之英才豈必山西之出將卿可

專於節制予不煩於指揮於戲羊叔子之緩帶輕裘  
江漢動色嚴節度之清名雅望雪山增高故茲教示  
想宜知悉

教守禦使金載瓚書

王若曰保障爲國家所重幹轄仗文武之才美哉襟  
帶南城傑然詩禮元帥惟卿儒素持已清白傳家故  
宅不蔽雨風尚有賢相國遺韻秘閣久掌圖籍實著  
真學士令譽剛方兼濟周通超九卿旋授銓柄文章  
一洗陳腐顧羣僚皆避詞鋒伊前後清顯之歷敷惟  
內外任使之靡替睠茲山營之險固實我京輔之關

防山谿壯鎖鑰之形托百年保釐之重臺隍據喉咽  
之地控三邦舟車之衝惟其人民之衆積峙之豐屹  
爲巨鎮所以城池之固器械之利甲於諸都董戎政  
而時許往來規模與摠營略等罷分司而專加管領  
體統視開府差尊蓋職任不比他焉故掄簡無出右  
者茲授卿以守禦使卿其祗服寵命克恢令猷組練  
不廢於春秋莫曰軍旅之未學綢繆必先於陰雨勿  
以昇平而姑安實倉廩而修堞壕寧擁虛簿撫士卒  
而明賞罰俱得歡心其餘設施自有裁臬於戲文恬  
武嬉之已久予所注意者深地利人和之相須誠欲

得君之重故茲教示想宜知悉

景慕宮祭享樂章文

己巳因

下教改撰

於休錫祉肅穆 离光龍旂裸將洋洋帝傍

於休一章四句

迎神

齋我誠明將以承筐猗那思成祀事孔康

齋明一章四句

奠幣

我牲既備于登于豆是享是宜子孫其佑

赫佑一章四句

進饌

帝眷篤生潛光駿聲升歌象德鐘磬有鏗

帝眷一章四句

引入

震索應天受命代理令聞餘烈後孫垂祉

震索一章四句 初獻

祝告維吉享儀不愆 神其保佑於千萬年

維吉一章四句 引出

篤慶延休其祥長發駿奔徂位肅雝對越

篤慶一章四句 引入。亞終獻同用

天啓休運德洽重光本支百世俾熾而昌

休運一章四句 亞終獻同用

於乎不顯徽柔養德既享我誠申降遐福

徽柔一章四句 引出。亞終獻同用

有芬有苾式禮孔嘉廢徹不遲登歌永嗟

有芬一章四句 徹邊豆

我禮卒度 神樂康而 鶴馭杳邈送霓旌而

我禮一章四句 送神

元子誕降陳賀頒教文

王若曰皇天眷顧 宗國申命用休彌月誕降元良

甲觀呈瑞斯乃古今罕覯之慶詎緩中外播告之脩

洪惟我家光膺寶命 祖功 宗德奚但六七聖相

承舜授堯傳永期億萬年悠久蓋其固本而垂統亶

由積德而累仁顧予寡昧之姿叨茲艱大之業 宗

祧民人之寄在眇爾之一身 先統繼嗣之傳每怵  
焉而深念春秋鼎盛思聞爲人父之稱國家孤危益  
望衍本支之慶幸天心默佑 宗祏伊坤闡篤生冢  
儲以時則庚戌流虹之時吉慶非偶是月也 肅考  
降彩之月前後相符上慰 陟降之靈 三宗之血  
脉載續下副臣庶之願八方之謳歌有歸追 先朝  
顧復之慈積慶攸暨仰 殿宮嘉悅之色爲樂如何  
濬哲長發之祥同殷人之歌烈祖岐嶷生知之質若  
周姬之誕文王禹景繼明洪基奠泰磐之重震索叶  
吉寶籙占海籌之長跋躡喑聾莫不蹈舞山川草木

亦皆知欣民情大可見乎國本自此鞏矣星重輝海  
重潤匝域之祈嚮方深日之吉辰之良自天之休祥  
丕著旣告慶於 太室又受賀於明庭天地之化同  
流咸蘇品彙雷雨之澤普洽盡滌垢瑕於戲萬禩無  
疆之基賴此祚胤之永錫三代有道之治又在諭教  
之必端偕我太平與之更始自貽哲命罔不在初故  
茲教示想宜知悉

王世子冊封竹冊文

王若曰建儲嗣所以承 宗廟之重正位號所以繫  
億兆之心斯乃古今之通規亦我 祖宗之舊典載

揚顯罔誕舉彝章咨爾 元子日表英明天稟仁孝  
能言而先辨文字率行則不煩賓師覃訏岐嶷之姿  
儼若不教而喻視聽動作之際已具大人之儀乃茲  
器度之夙成又見衣尺之日長周家錫胤皆由積累  
之仁漢儲定名舉切早建之願在邦禮而允叶亦僉  
議之大同吉祥咸臻值 聖祖開初之歲儀文節約  
體昔日祈永之心茲命爾爲 王世子爾其勉修威  
儀祇服命戒非講學無以明理惟進德莫如誠身常  
遠柔佞而禁於未然亟祛玩好而毋謂何害兢兢乎  
危微精一之訓孜孜於禮樂書數之文孝者爲百行

之源動遵文王世子學而上聖之域必曰大舜何  
人親宦妾時少親賢士時多必須左右之皆正謀龜  
筮而從謀庶人而吉亦驗壽祿之无疆克念今日提  
耳之言庸副舉國延頸之望故茲教示想宜知悉

王大妃殿壽躋六旬陳賀頌教文

王若曰八千歲爲春泰運屬三陽之會九五福曰壽  
長樂躋六旬之齡凡在陶白孰不懼忤恭惟稟性淵  
靜秉德柔嘉奉 慈闈盡孝盡誠嗣徽音於莘摯事  
寧考克敬克順播至化於葛覃儷日爲明贊丹扆登  
三之治倪天作配符黃裳在中之文猗歟四十載

母臨允邁古哲后坤範顧予冲藐之質早承艱大之  
基庇覆撫育之止慈十年一日寒暑疾病之貽念自  
夏徂冬耳順之寶籌方隆志養之微忱益切受皇  
極之錫福正直平康仰厚坤之體仁含弘光大景貺  
膺川至之祿羣情顯嵩呼之誠體昔年之撝謙尚闕  
顯號歷多日而回聽只舉賀儀景籙符莊烈仁  
元故事述甲寅乙卯先朝之花甲載屆顧小子當  
作何懷北堂之莫暉彌長願萬年皆如此日志慶節  
喜宜推一視之仁洗垢滌瑕爰舉肆赦之典於戲誦  
九如升恒之什推吾老而及人值百祿咸萃之辰思

一國之興孝故茲教示想宜知悉

王大妃殿周甲誕辰陳賀頒教文

王若曰仰慈天之高臨采切愛日值舊甲於長樂  
聿回誕辰喜騰六宮綸頒八域洪惟太母之隆功  
至德克邁前代之聖后哲妃漢練儉昭夙著戒濯龍  
之譽齊詩頌播恒懋警鳴雞之誠玄機贊乾九之剛  
德合中正黃裳叶坤五之吉物歸含弘慶毓塗山誕  
承明聖母徽範籌添海屋適追仁元后寶齡顧  
予寡昧之姿每荷庇覆之眷春秋過耳順之歲願萬  
年之如今晨昏奉膝下之歡養一國而不足肆當是



年之慶節益迓自天之洪休惟其幽靜之姿致此得其壽得其位之福顧茲洞屬之念益切一以喜一以懼之忱然平日撝謙之心常戒豫大修內厨薄需之具不許豐呈既受賀於大庭百僚同慶仍解澤於匝域萬品俱新於戲八千歲爲春爲秋新奠獻瑞九五福曰康曰壽靈萱長輝故茲教示想宜知悉

惠慶宮寶齡八旬陳賀頌教文

王若曰今天其命歷年景籙湊三陽之會每歲願如此日慈壽躋八旬之齡詐緩播告之脩茲乃罕覩之慶恭惟塗山毓祉京室嗣徽琴鍾媿少陽之儀稟

姿幽靜珩璜叶中饋之度秉德和貞翼翼小心周室頌思媚之德洋洋洪福殷家膺長發之祥所誦者善行嘉言得自小學致謹於周旋動止夙有令聞惟寡躬承艱大之基而慈闈賴保護之眷泰運方撫自知懿訓之是資謙志難回竊歎儀物之未備猗歟盛烈之孔暢聿覩大耄之光躋愉愉左右就之辰每仰年德之俱邵憧憧一再飯之頃益切喜懼之交深符聖祖癸巳賀儀已占九五之嚮用想先朝乙卯孝思敢曰萬一之仰承祇薦明禋禮則循故仍宣渙綍嘉與維新蕩垢滌瑕法義經雷雨之解推恩施惠順

月令發育之功於戲 慈德克享天心萬民仰亨泰  
之會吉慶肇自歲首太史占大有之書故茲教示想  
宜知悉

外製集

教咸鏡道觀察使金憲書

王若曰歷數海東八域雄藩獨稱於邊防專統關北  
一方諸閩咸聽其節制非重臣莫可使也當是時屬  
之誰乎惟卿名門肖孫華署學士講說雍容可聽淵  
源有來議論激昂自持酒酣以往金帶自致於八座  
苦蘗清規玉節曾假於兩藩甘棠餘頌凡內外履歷

之地而大小咸得其宜言念丙枕宵旰之憂尤重北  
藩懷撫之政龍興王迹至今說豐沛舊鄉烏棧地形  
從古稱隴蜀故道士馬甲兵之精銳臺隍亭障之堅  
固軍容壯而國勢可尊朔氣豁而邊警宜熄然王化  
未遍於遐遠旣失撫御之方而民俗半雜於華夷率  
多麤悍之習士皆解體楚軍多菽水之艱人無恒心  
鄭盜有萑澤之聚山社之奠接無策政須實心之懷  
綏 廟宮之儀品載新尤見事面之重大非卿莫可  
得人於斯茲授卿以咸鏡道觀察使卿其勉恢良圖  
思副寵命布教條而振士習明紀律而詰戎機蓼貂

之禁尚嚴遍察廉貪弓馬之俗難化并施恩威如其  
稟處裁斷之方有掌故耳至若弛張設施之道宜肩  
乃心於戲隻日花輒出自三清卿月千里榆塞去作  
一路福星故茲教示想宜知悉

教黃海道觀察使李泰永書

王若曰朝廷慎屏翰之寄必揀通才海藩重節制之  
方誰任敗局銓剡允叶僉議攸同睠彼黃海一區實  
是青丘重鎮控灣塞千餘里地勢若唇齒輔車環溟  
嶽廿三州土產則魚鹽銅鐵燕輶相望於道路供億  
難支唐舶時警於海汭虞憂未弛矧茲延白告飢之

日政須龔黃治郡之才自春而判旱乾之灾野無遺  
秉未秋而多流離之患民將疇依王食靡甘先施蠲  
恤之典繡衣纔返預講調救之方哀我民斯屬之誰  
也惟卿明通之識愷悌其姿玉署銀臺自有望實之  
俱著南城西邑尤見聲績之素稱自是漢家循良之  
才宜畀周陝保釐之責茲授卿以黃海道觀察使卿  
其祇服寵命益殫嘉猷綏我小民毋使一夫不獲無  
憚大吏克明三考之規自餘稟裁之方有掌故耳惟  
今懷保之道宜肩乃心於戲暇日蓉亭卿必多北望  
之戀荒歲蔀屋予則忘西顧之憂故茲教示想宜知

悉

教平安道觀察使金載瓚書

王若曰漢制出由九卿人望時或外重虞廷詢咨四岳廟議必須僉同矧今舉措之一新尤合小大之歷試惟卿賢相國肖子真學士令譽精白自居銓地戎垣之沛乎有裕雌黃莫到險塗末俗之超然不羣剛方踈坦而綜物則分寸靡遺愷悌祥和而律身則繩尺不苟予自有簡心之殊知卿則勵許身之素蘊瞻茲關西一鎮實爲海東重藩田制留箕聖之餘民易使而俗易教戶役倣先王之舊法則美而弊則隨上

國之冠蓋星馳厨傳供億之相續邊門之銀貨輻輳駟僮奸蠹之多端四十州城池關防孰知繭絲之可損屢百年休養生息漸致衣衾之或踈加以邊邑之歉荒尤值公私之罄竭殆同殘杆敗局之勢實難支吾苟非熟路輕車之才疇能整理茲授卿以平安道觀察使卿其祇服寵命往殫嘉猷追孟博攬轡之風澄清一道恢范老藏甲之略彈壓四門樽俎折衝可以近懷而遠服冰蘖礪操庶幾吏戢而民孚自餘稟裁有掌故耳凡厥政務宜肩乃心於戲緩裘帶於第一江山必多南樓之餘興阻冠佩於九重天陛若爲

北斗之每依卿其往哉予且召矣故茲教示想宜知悉

教平安道觀察使金勉柱書

王若曰維八藩鎮最重關西歷數摺紳鮮出卿右瞻周行而疇若稱是職也實難惟卿知遇先朝孝謹華閱居官著廉勤之譽綽乎有古人風處世絕紛競之心澹然是寒士樣若不出訥訥其言而事之所在激昂自奮未嘗爲切切之行故人鮮知其規模所存畀畿甸之旬宣除目屬耳雖沉屈之年久益肩乃心惟箕封四十州雄藩倣漢廷二千石良吏子女玉帛

之咸聚地稱川蜀之饒士馬弓甲之莫強境接遼薊之野八家之井地猶在古都山川千里之屯堡相望孔道冠蓋近者客使之迎送加以年事之荐荒山採銀蓼旣民弊之不一泉流錢木爲吏弄者居多連年經用之難支陰雨綢繆之未備殆同殘枵敗局着手至難苟非熟路輕車曷膺是選視諸路爲任甚重當此時捨卿其誰茲授卿以平安道觀察使卿其克恢乃猷毋替予訓練兵課士以示長久之方理財恤民須體節用之道惟公清可以彈壓列邑有威猛然後鎮服邊門若規畫更何有云伊謹約非所加勉於戲

緩裘帶於江山第一方面觀風阻冠珮於天陛九重  
寸心向日故茲教示想宜知悉

金陵集卷之五

金陵集卷之六目錄

箋狀

大殿聖節內閣賀箋

冬至內閣賀箋

大殿聖節內閣賀箋

王大妃殿壽躋五旬 惠慶宮壽躋六旬稱慶

大殿陳賀箋

大殿聖節關東賀箋

大殿聖節內閣賀箋

冬至關東賀箋

冬至內閣賀箋

正朝關東賀箋

正朝內閣賀箋

王世子冠禮冊儲時關東賀箋

王世子冠禮冊儲時內閣賀箋

正宗大王祔 廟時嶺南賀箋

正宗大王祔 廟時內閣賀箋

大王大妃殿 王大妃殿上冊寶時 大殿嶺南

賀箋

大王大妃殿 王大妃殿上冊寶時 大殿內閣

賀箋

大殿嘉禮嶺南賀箋

大殿嘉禮內閣賀箋

大王大妃殿聖節嶺南賀箋

冬至嶺南賀箋

冬至內閣賀箋

大王大妃殿冬至嶺南賀箋

仁政殿火災後嶺南慰箋

大王大妃殿撤簾後嶺南賀箋

大殿躬親庶政後嶺南賀箋

元子誕降後 王大妃殿 親上箋

元子誕降後 惠慶宮 親上箋

元子誕降後 嘉順宮 親上箋

王大妃殿壽躋六旬陳賀 親上箋

王大妃殿周甲誕辰陳賀 親上箋

惠慶宮寶齡八旬陳賀 親上箋

嶺東西諸倉減糶事宜狀

移禮曹論鄉試狀

嶺南年分狀

論船艙狀

啓

上辛祈穀祭用立春前後當否博攷啓

王大妃殿 惠慶宮詣 闕宮行禮時合行儀節

博攷啓

請明正學仍論科試講規啓



金陵集卷之六

宜寧 南公轍 元平 著

箋狀

大殿聖節內閣賀箋

伏以聖作千年賁至治於建極時維九月臨令節於  
繞樞喜溢邇班歡均匝域恭惟右文爲治大德難名  
奠洪基於磐石泰山一人有元良之慶敷聖化於金  
膏玉燭萬民囿陶鑄之功肆當虹流之辰舉切熬忭  
之悃伏念臣等才慙鳳藻職忝龍圖處宿儒深嚴縱  
乏判花之譽祝 聖人壽富長頌絲瓜之祥

冬至內閣賀箋

伏以風行草上舉切星北拱之忱雷在地中正屬日南至之候是月也子自天而申恭惟七政以齊一念對越聖人則天魏乎蕩宗祊泰磐化國之日舒而長民生咸囿茲當履長之節益迓鼎來之休伏念臣等地近蓬萊才慙黼黻校雲章於奎閣安有真學士譽瞻日表於銅闈願效華封人祝

大殿聖節內閣賀箋

伏以自天用申歌騰星海是月建戌節屆虹流千歲呼嵩五雲多處恭惟魯聖不惑周文無憂大人繼明

貳極叶重離之慶王者上瑞八域頌屢豐之休茲當斗繞電之辰益仰升如日之福伏念臣等才慙璧府籍忝奎華西清昵陪幸寵光之密邇南山拜獻效微忱於起居

王大妃殿壽躋五旬

惠慶宮壽躋六旬稱慶

大殿陳賀箋

伏以勤庶政於一日二日窳宇敷治躋寶齡於五旬六旬殿宮騰賀同時兩慶新歲三呼恭惟頌叶前星孝準東海千乘備志物之養九五康寧一人有元良之譽四重歌曲肆當獻發之會益仰慈覆之

恩伏念臣等豹直摛文龍圖聯武金華題帖粗效岡  
祝之新詞玉佩趨班更頌川至之景福

大殿聖節關東賀箋

伏以哲命維新於鳳曆蒼籙自天昌運載廻於虹流  
黃華是月五雲瞻望萬歲歌呼恭惟文王無憂聖人  
必得建皇極之巍蕩囿至化於玉燭金膏鞏國本之  
靈長奠洪基於泰山磐石屬當斗電之慶益仰升日  
之祥伏念臣跡滯東藩心懸北極楓嶽之巡行未撤  
徒切千里之祝華花輒之舊步回思若爲此日之望  
斗

大殿聖節內閣賀箋

伏以九五福曰康曰壽方仰升如日之休八千歲爲  
春爲秋政當斗繞電之瑞茲逢大慶遙望三呼恭惟  
德與年高慶自天貺農政訪正月之首八域驗屢豐  
之祥睿學篤三朝之餘一人有元良之譽茲當九秋  
之令節益仰萬年之純禧伏念臣方面觀風寸心向  
日旌節住金剛之界北望五雲簪珮阻玉筍之班東  
還幾日

冬至關東賀箋

伏以莫暉舒於紫極天降申休葭律回於黃鍾冬至

子半百祿川至七日陽來恭惟在舜玉衡膺堯寶曆  
聖人則天巍乎蕩大德無名化國之日舒而長至治  
旁達茲當履端之會益迓鼎來之祥伏念臣逃矣東  
來倏爾南至地按八百里瀛海方面觀風天保億萬  
年岡陵寸心向日

冬至內閣賀箋

伏以珠衡凝撫辰之治維天陰隲璇杓廻建子之候  
是日陽生半夜雷聲千官雲賀恭惟則天爲大如日  
之升建一統而兼君師皇極皆本於錫福尊中國而  
攘夷狄天道每主於扶陽肆當小至之辰益迓大來

之慶伏念臣東來半載北拱一心萬八門起居之班  
跡雖阻於楓陛九五疇康寧之祝願切效於華封

正朝關東賀箋

伏以八域呈屢豐之瑞誕撫洪休三陽值回泰之機  
聿迓景福青達淑氣紫極祥暉恭惟堯曆授時箕疇  
歛福 殿宮之寶齡益邵祝九五於岡陵胄筵之尺  
衣漸長騰四重於星海肆當盛德之在木益切羣工  
之祝華伏念臣出自邇班倏逢新歲稱兕觥於萬壽  
瞻彼北宸阻鴈列於三更逃矣東土

正朝內閣賀箋

伏以箕疇錫福仰大德之有臨堯曆授時喜景運之  
交泰建寅之月用申自天恭惟運躋升平德合乾健  
千乘躬誦讀之課春秋考亭之書一人有元良之譽  
文王世子之孝茲當三陽之泰運益仰百祿之鼎臻  
伏念臣不才分憂伊教匪怒東來玉節曾無萬一之  
對揚北望瓊樓遙祝九五之康壽

王世子冠禮冊儲時闕東賀箋

伏以邦基泰磐左海屬千一之運 儲位豫建萬姓  
騰四重之謠慶溢 宗祊歡均動植恭惟謨丕裕後  
德懋承先無憂周文積累綿長之攸本有賢夏啓謳

歌訟獄之皆歸猗歟加冠之禮初行允矣冊儲之儀  
同舉伏念臣延頸小海滯跡重關奉歲首之綸音陽  
春布德想 天顏之喜悅瑞日重輝

王世子冠禮冊儲時內閣賀箋

伏以寶籙屬泰來之辰諸福畢集瑤冊定豫建之禮  
元服始加一日禮行八域歡舞恭惟大德必得元良  
篤生周嗣重加弁之儀以歲之元以日月之吉漢儲  
鞏主鬯之位荷天之慶荷 祖宗之休方羣情爭瞻  
前星伊盛儀載舉貳極伏念臣歸心如水喜報自天  
想大庭賓僚百官陪就日呼嵩之列同一路父老長

吏效依斗祝華之誠

正宗大王祔 廟時嶺南賀箋

伏以見于羹牆方切三年之餘痛享之 宗廟益仰  
萬世之不祧悲慶相仍情文允叶恭惟纘禹新服協  
舜重華承 祖宗艱大之基一念繼述猗帝王學問  
之篤三書講論禮亦宜然德至盛矣伏念臣分憂南  
臬懸誠北宸 清廟升歌縱阻駿奔之列彩函遙擎  
自切鰲忭之忱

正宗大王祔 廟時內閣賀箋

伏以殷制畢三年之喪廓然靡逮周廟祔百世之祀

於戲不忘廣慶之辰餘哀未已恭惟善繼善述乃聖  
乃神食則羹坐則牆優然如在其上踐其位行其禮  
巍乎有光于前茲當中月之期舉切終天之慕伏念  
臣 先朝內閣今日南藩 清廟升歌遙切如復見  
之悃遐土宣誥幸覩與同慶之休

大王大妃殿 王大妃殿上冊寶時 大殿嶺南

賀箋

伏以至性盡倫咸仰 聖孝上冊陳寶聿覩盛儀物  
采增光情文允叶恭惟舜孝東海文德三朝 至尊  
躬會閔之行享隆長樂大德得堯舜之位養以一邦

茲當慶喜之辰更切悲愴之悃伏念臣誠懸北闕跡  
滯南藩王節乍淹縱阻呼嵩之列瓊函遙奉敢效祝  
華之誠

大王大妃殿 王大妃殿上冊寶時 大殿內閣

賀箋

伏以禮制已畢於三年羣情靡逮冊寶同上於 兩  
殿 聖孝益光北望三呼 東朝兩慶恭惟冲年嗣  
位愛日深誠學問思辨之工遵 先王身教之盛朝  
夕寢膳之節盡孝子志養之方茲當緝儀之成益迓  
景籙之至伏念臣每遇吉慶倍馳忱誠逖矣是蓬萊

五雲未隨諸學士同慶居然滯嶺嶠千里愧乏良刺  
史宣揚

大殿嘉禮嶺南賀箋

伏以乾健不息丹宸著登三之治坤厚無疆黃裳叶  
在中之吉禮行一日歡均四方恭惟承歡 東朝納  
配名闕鴻謨貽燕恒念志事之繼述麟趾關雎實本  
夫婦之造端茲當 中壺之正儀益迓 宗祊之景  
籙伏念臣南藩跡滯北極心懸億萬世本支子孫奉  
瑤函而繼祝七十州父老長吏望王闕而齊欣  
大殿嘉禮內閣賀箋

伏以王者之治正化方仰修齊之基君子之道造端  
聿覩親迎之慶六禮斯備百福之源恭惟主鬯宗  
祧造舟渭涘鳳凰高岡梧桐生矣八域仰姬文之謨  
睢鳩河洲葛之覃兮六宮騰周姒之頌猗歟坤厚乾  
承之德益迓日升月恒之休伏念臣適在遠方逢茲  
大慶同父老長吏遙伸呼嵩之儀使聖人多男繼  
切祝華之悃

大王大妃殿聖節嶺南賀箋

伏以天佑陰功慈化洽於八域月回陽復慶節屆  
於千秋簾帷遙瞻簪紳均忭恭惟大德必壽慶禮無

前淵懿性委女中有堯舜之聖清明化理天下望宣  
仁之謨茲當嵩呼之辰益迓泰來之福伏念臣觀風  
方面向日寸心王節遲徊於嶠南此歲云暮瑤函擎  
奉於閭闔何處五雲

冬至嶺南賀箋

伏以玉樓寒炎親萬幾而以朝以夕天命申休黃圖  
日月駐八千而爲春爲秋冬至子半袞繡增色宮線  
添工恭惟順時而行扶陽之治豐年乃王者之瑞八  
路均登家人爲治平之基六宮同慶茲當雷復之候  
益播日升之章伏念臣誠切葵傾譽之棠憇五雲望



丹鳳之闕縱阻呼嵩之班千里滯朱鳥之鄉益切祝華之悃

冬至內閣賀箋

伏以聖人則天巍乎蕩草上風行化國之日舒而長地中雷在是月也子自天而申恭惟夏曆調三虞衡齊七堯舜法遠祖宗法近繼述乃孝之先乾坤合位日月合明修齊爲治之本茲當復陽之節屆益仰泰運之鼎臻伏念臣一辭蓬雲又見嶺雪千門萬戶開次第政屬日南至之辰四更三點候起居遙切星北拱之悃

大王大妃殿冬至嶺南賀箋

伏以天命申其休風行草上冬至子之半雷在地中海屋添籌箕疇斂福恭惟以女堯聖居文母尊護聖人躬囿治化於金膏玉燭體寧考志措國勢於磐石泰山茲當雷復之辰益迓日升之慶伏念臣千里滯臬一夢朝天遙瞻漢長樂齊籙之班逖矣南服竊效堯華封請祝之悃拱于北宸

仁政殿火災後嶺南慰箋

伏以至化誕敷廈穉勤咨訪之念司耀告警法殿值鬱攸之灾寅畏之辰震惕曷已恭惟緝熙懋學化育

叅功遇灾修省常致謹於天人之際居尊兢畏未或忽於雨暘之愆茲當告灾之非常敢效陳慰之故事伏念臣曷日反面如水歸心王節將還喜重寄之解免瑶函敬奉慰 聖心之震驚

大王大妃殿撤簾後嶺南賀箋

伏以養隆千乘篤 聖孝於四載簾撤長樂誕 慈教於十行賀騰簪紳事曠簡策恭惟追 先王志保聖人躬當國家艱大之時功不在於禹下有宣仁堯舜之稱德則侔於女中茲當慶禮之無前益迓景籙之來降伏念臣尚此須代倏逢新年蓬萊五雲長獻

恒月之頌嶺嶠千里愧乏觀風之譽

大殿躬親庶政後嶺南賀箋

伏以備千乘之志物養隆 東朝仰萬機之躬親簾撤長樂德至盛矣孝莫大焉恭惟三朝禮勤五辰治撫春秋鼎盛符孔聖志學之年日月就將慕大禹惜陰之德屬當新歲之慶禮益迓皇天之洪休伏念臣反面何時歸心如水王節將返喜重寄之新卸瑶函敬呈替起居之微悃

元子誕降後 王大妃殿 親上箋

伏以養隆 東朝方切親心之慰悅慶叶彌月聿見

元良之篤生與情胥歡國本永鞏恭惟位尊文母德  
媿女堯贊陰教於先朝克著嗣徽之化篤保護於  
小子每企錫胤之祥幸天心默佑宗祊而坤闈誕  
生冢嗣星重輝海重潤八方之謳歌有歸月之吉辰  
之良我家之慶祿允叶伏念臣以千乘養篤三朝誠  
追昔日顧復之慈遇喜增感繇百世本支之慶無疆  
惟休

元子誕降後 惠慶宮 親上箋

伏以海屋增籌方深愛日之悃坤闈篤慶克叶彌月  
之祥八域歡聲六宮喜氣恭惟仁德毓祉柔化含章

協氣普洽於宮闈克享熙運 慈念恒係於宗祏  
則篤餘休乃茲冢嗣之誕生益驗皇天之垂佑主鬯  
副延頸之望一人元良含飴供置膝之歡曾孫有慶  
伏念備志物養荷保護恩磐泰鞏基欣聞四重之頌  
岡陵獻祝願駐三春之暉

元子誕降後 嘉順宮 親上箋

伏以衍景祉於昌熾皇穹垂庥慶元良之誕生 慈  
闈告喜國勢增重羣情胥歡恭惟德叶柔嘉姿稟和  
順自寧考簡選之日動循禮儀逮小子隆奉之辰  
采存謙抑幸茲冢嗣之篤降益驗積慶之餘休符庚

成流虹之祥天休申命奠 宗社固磐之勢 慈德  
攸推伏念恩荷劬勞養備志物日月星海喜聞八域  
之謠松柏岡陵恭獻北堂之壽

王大妃殿壽躋六旬陳賀 親上箋

伏以正月日之元昕庭獻千歲之祝大德壽必得長  
樂躋六旬之齡賀騰新春慶符先甲恭惟受一國養  
居 太母尊厚坤體仁著含弘光大之德慈天高覆  
勤保護撫育之功猗第祿衍眉壽之期而寶壽屆耳  
順之歲 先朝之花甲載屆顧小子當作何懷北堂  
之莫暉彌長願萬年皆如此日肆舉高呼之禮益迓

川至之休伏念臣喜深知年誠切愛日詠南山不騫  
之什九如升恒值東方罕有之休百祿咸萃

王大妃殿周甲誕辰陳賀 親上箋

伏以海屋添籌仰皇天之篤佑 慈殿稱慶值甲日  
之誕迴動植皆歡情文備至恭惟以女堯聖居文母  
尊八域仰翟禕之臨鴻烈彌著六宮戴裘冕之化燕  
謨斯貽猗歟休命之用申聿迴長樂之舊甲追昔日  
之謙異每恨德無能名戒歉歲之豐亨益歎禮不稱  
意大庭舉高呼之禮吉日迂川至之休伏念臣知年  
喜深愛日誠切值東方罕有之慶億萬斯年詠南山

不騫之詩九五曰壽

惠慶宮寶齡八旬陳賀 親上箋

伏以我家千一有之辰諸福咸湊 慈闈八十歲之  
壽縉儀賁成禮行大庭歡均匝域恭惟塗山毓祉京  
室嗣徽六宮播衣練之譽德配哲后三朝供舞綵之  
喜慶篤曾孫猗功化克享天心伊吉慶肇自歲首聖  
人有德必壽符 英考癸巳賀儀王者與衆同歡體  
先朝乙卯故事肆當頒椒之日敢效獻篚之忱伏念  
荷保護恩獻升恒祝雞鳴問寢長聞內豎之曰安鰲  
抃呼嵩暨與外庭而同賀

嶺東西諸倉減糴事宜狀

臣於本月二十日準備邊司回啓關節該因本道暗  
行御史權駿書啓敬奉 聖旨諸條舉行令道臣從  
長釐正狀聞宜當者臣謹依司關看詳駿所奏爲十  
餘條而尤以糴糴裒益之政爲祛弊之本其一三陟  
府四美倉皮穀雜穀并爲三千四百五斛該倉屬民  
戶不過四十統一戶歲受二十餘斛量宜移換於府  
內各倉事也其一歙谷縣諸倉所在黃豆多至九百  
二十斛及秋捧糴民多轉輸他境而租爲三百四十  
斛種糧每患艱乏就黃豆限折半撥作事也其一江

陵府嶺西凡有六倉皮穀雜穀并爲二萬六千四十斛民戶不過四十六統一歲之內一戶所受多至百斛少不下四五十斛若值歉荒民皆逃散而至於嶺東諸倉各樣公用皆從此出故穀簿漸縮以嶺西之穀從便換作移置嶺東實合兩便事也繡衣所見適爲一二邑而統一道論之則糶糴之無法莫如關東皆由詳定區畫之不得其方而奸鄉猾吏積久舞弊如欲大加釐革則邑鎮將有騷擾之慮姑爲因循不改則民弊終無矯革之日此爲兩難而至於江陵府嶺西倉穀多之弊流來已久八年前觀察使尹師國

因御史書啓六倉穀萬餘斛作錢移送於他邑其後又以春耳年五千二百斛發賣移給於詳定不足之諸郡縣一從民願施行庶幾民可息肩穀不爲弊而第緣年復年民戶之自爾漸縮以致數萬包減損而弊猶自在前後營邑之臣非不熟講裒益之政而已成痼瘼了無良策雖有一時通變之宜而終無永久矯揉之道今因繡衣之復命乃有釐正之成命其所對揚決不可一毫少忽故翻關知委於該府該縣使之量度彼此事勢詳探民人願否論理報來矣節呈三陟府使李壽彬牒報內該倉處在深災營邑

耗剩歲益增加監官色吏取便移納已成謬習穀多而羸民皆厭避及今移轉庶可矯揉取該倉穀最多者除出嗣後種糧之資限二千斛執錢減數不然則限千餘斛以黃豆粟依準折法姑爲換作代捧待明年春移轉他倉爲便云云歙谷縣令洪樂真牒報內本縣各倉所在穀黃豆爲九百二十斛民不業耕每當糶糶往買他境租則只爲三百四十斛種糧分給之際難以排巡限折半以租準折換作則實爲邑民莫大之惠澤云云江陵府使趙興鎮牒報內本府嶺東三倉則穀簿不敷排巡苟艱嶺西各倉則在在穀

多計一戶所受殆近五六十斛其中粟木麥春耳年四種尤爲夥多故臨溪倉所在木麥六百斛粟五百斛今年春自本府移轉嶺東各畝而嶺東之民專治水田粟木麥本非宜土本穀辦納其勢未由木麥以黃豆粟以租準折換作以此易彼東西兩便蓬坪倉所在稷爲二百餘斛而該里處在山谷曉峭之地不但民不廣耕亦不合於荒歲周賑之資小豆則自是嶺西廣耕之穀而穀簿所錄僅爲一百四十斛并從民願稷限二百斛以小豆準折換作爲宜向前換作條一千三百斛外各倉穀粟爲四千三百八十斛春

年爲三千八百三十斛耳年爲七千二百七十斛就其中限折半及今除減然後窮災民戶可以奠居而嶺之東西道里險遠全出牛馬轉輸則民將不願其在一視之政有欠兩便之道如或仍置則遠不過四五年民將扶攜逃散勢不但已右項穀折半條粟二千一百斛春年一千九百斛耳年三千六百斛以錢代捧移送嶺東三倉隨其土宜以黃豆租換作實爲便好而七千餘斛之同時作錢碍難辦理有難并督則今年限折半明年限折半視市直高下取捨則糴弊可祛民力可紓云云三陟四美倉事該府使兩條

措置不無意見而第其作錢一事未可輕議除非本穀無轉運之道計出迫不得已則錢穀換買之際吏緣爲奸民受其苦理所必至且該里之民介在深山窮峽之中錢貨極艱生計蕭然今若一時執錢臨歲催科則目下民願設或如此來頭繹騷不可不念其所以祛弊者適足以生弊矣蓋春耳年木麥宜於災而不宜於野本穀移送民既不願則勢將以峽野俱宜之黃豆粟姑爲換作待明年春轉輸他倉彼此俱便且黃豆粟比年麥虛實顯殊其於穀簿亦無所損今年則先以春耳年木麥限一千斛準折換作計察



民情與事勢又明年量宜移送恐合事宜歛谷各倉所在黃豆爲九百餘斛在他邑不足爲多而該邑民戶不過爲五六百內外每以不宜土之穀分給徵督叅以民情邑報不可無闊狹之道限折半以租準折換作甚好其餘衙前庫子換倉遞納之弊惟在營邑隨事而禁斷江陵府嶺西倉之民少穀多弊旣如右欲行裒益之政則東西隔以大嶺彼此判若二邑道里之險遠牛馬之轉輸多有不便而嶺東則穀不宜土他邑則亦無願受本穀轉移之到處掣碍果如邑報至於代錢則雖有近年執錢之申禁而此指捧糴

時防奸有非膠守於通變之際者則此一條庶爲東西俱便之策春耳年粟三種限以折半分劃兩年作錢移送於嶺東各倉則穀多民少之積弊可以永祛第伏念糶糴法意至重且嚴勿論代捧與換作一從準折法施行自是各道通行之例則以穀換作以錢換買之間不減於應行科式然後方可議此本道穀詳定價定式黃豆租一斛錢各一緡五錢粟一斛錢一緡三錢春年一斛錢一緡耳年一斛錢四錢而各穀準折之法則粟一斛代黃豆爲十二斗五升租爲一斛六升二合五夕春年一斛代黃豆爲十二斗租

爲一斛耳年一斛代黃豆爲八斗租爲十斗則今若依邑報以詳定價執錢於嶺西以詳定價換買黃豆租於嶺東粟一斛代黃豆租各爲十三斗黃豆則比準折加爲五升租則比準折減爲二斗六升二合五夕就黃豆租兩穀此多彼少料量換作要使不減於以粟準折則在穀簿無少損在災民爲蘇弊此則別無拘碍之端至於春年耳年則穀本至賤價又低歇以詳定價換買黃豆租則春年一石之價爲黃豆租十斗耳年一石之價爲黃豆租四斗比之準折科式其所見縮或爲三分之一或爲五分三民弊矯揉雖云

急務穀簿減縮亦非細故此不可以從前一二之已例遽然違越於遵守之法例蓋本道詳定穀不足每年多則爲萬兩少不下七八千兩以帖別備加分耗條作錢給代已成近例今此春年耳年五千五百斛以詳定價執錢不過爲三千三百四十緡以此區畫於各邑詳定不足之代則雖不移送嶺東換作他穀嶺西倉還多之弊自可祛矣此或欠於兩便完好之策而猶有愈於一例因循之弊臨溪倉穀一千一百斛之本穀移轉各倉粟二千一百斛之以錢移送在嶺東爲黃豆租三千餘斛則此足爲一時裒益庶不至

排巡苟艱糶二百斛之小豆準折以麤換精亦合便  
宜并依此施行其外繡衣所奏中合行條件商量便  
否條列于左請令廟堂稟旨分付

一襄陽杆城封進銀口魚已於繡衣回奏之前許令  
蠲罷臣不勝欽仰萬萬外此嶺東諸郡亦有鯁魚  
松魚等進貢而或致魚產之絕乏與節早難買之  
時則轉求他道京司情債與雜費歲以千計近聞  
因月令退限雖或艱辛封進該曹先用北關所封  
以備薦獻之需此則皆歸曹屬分兒云若然則事  
體尤爲無義并令依銀口魚例施行甚便茲敢具

由恭俟指揮

一通川添海錢一千七百緡息利條之勿令該吏責  
應繡衣所論甚爲至當沿海魚貢蓋寓任土之儀  
物隨節漁獵自是海夫之本業今此該邑變通雖  
緣魚產漸貴情債日增要免自官備納之弊而事  
面極爲苟艱自今爲始就其中除利息條六百緡  
以情債依節目防給價米則令海夫受出備納物  
膳亦可使貧殘吏屬終無替當之弊以此知委定  
式恐合事宜

一銀溪驛入居錢減罷事繡衣有所回奏而在昔李

施愛之亂該驛以北關直站撥報旁午難以支吾平陵祥雲兩驛馬二十匹入居舉行亂平之後改以價布一千三百匹代錢一千三百緡輸送歲以爲常其後因御史鄭澔書啓蠲減五百兩其餘則至今仍置以爲孔道責應之費當初設施雖出一時之權宜今若還爲出給則失之者非徒其情可矜得之者亦無大段所益况今該驛凋弊日甚之時縱不得益加顧助行之既久之事豈合遽議減除此則依前施行無妨亦令廟堂從長稟處

移禮曹論鄉試狀

卽因本曹移牒節該以鄉試新定式變通臺官旣經論奏已蒙 批旨各道須以事宜便否具意見論理回報以爲趁卽稟處宜當事本月二十一日到付本道卽以移內辭緣翻關知委於管下州郡矣列邑論報今皆齊到而舉以營下設場爲不便當初使監司主試仍以營下邑永定試所蓋倣田政覆審監司都事主管之古今已例而特軫殘邑輪定之弊意以營下本官事力稍裕比他差勝伊時 聖教亦以試可之意屢及於廟堂而行之未久事多掣肘今觀邑牒則其說便否雖各參差若其仍舊之論可見大同之

辭雖以本道言之山縣海郡限以大嶺判若二省道里之遠關隘之峻險比諸道最甚今以營下永定試所則赴舉諸生遠者常遠近者常近槩其事勢之斑駁毋怪辭說之紛拏自前監試每以嶺西之春川等九邑嶺東之江陵等四邑一依井間置簿分定而外此諸邑之處在山峽深僻與沿海荒遠者不爲并論專取道里之均適而然也自此以後嶺東赴舉之士每式年輒費距營邑四五百里之勞而嶺西近邑則坐享其利此其一弊也西北兩南營下邑力果可支當而至於所管本州則所賴俸資本自涼薄欲以

一邑之力獨當十數州輪回之苦又舉許多年間闊之役專責每式之費近年事目雖有列邑扶助錢名色之若干添補者而上下接應之資出入供送之繁實有狼狽削弱之慮加以試邑吏民主客俱困遠道諸生之前期留接者些少錢糧先已罄盡於旅店煙債則勢將有侵徵牽制之患殺炊雞黍鬻貨馬芻物價之踊貴閭里之騷擾往往蕩敗產業而至於下第歸鄉債負纏結甚則有留巾服逃避之人傷損風化誠非細故列邑每以一經試役謂之三年未蘓而今以一州吏民輒當式年并受其苦間或有增廣慶科

等諸試則其所往來殆無虛歲此其二弊也國制漢城試用三品官主試而諸道則以侍從臺諫差遣監司本二品官乃與侍從臺諫諸人分左右道試士體貌反重於漢城之試此甚不可而若今之湖南道臣方以正一品重臣出按者則此可爲親臨命官而反絀爲鄉試考官此非內重外輕之義而科試規模亦多乖謬此其三弊也凡科試前期一日差出試官承牌之後例不得許歸私第又或臨時撥所防奸操切慮無不周而今則試官有預定之人試所有元定之邑設法之初雖無見聞以今士習之澆漓躁競安

知無日後之私徑關節乎此其四弊也凡此四弊不但敝職之意見如右曾與列邑守宰商確講論而又採多士之物議非止一再其末段所論尤有深遠之思慮焉大抵掌試者之以都事或道臣中稟旨差定之舉雖倣田政故事而古今異宜左右妨碍諸生赴試之遠近相懸營下民產市價騷擾騰貴爲弊倍甚道臣主試體貌尤有相妨而日後科場紛競之風實有因此僥倖之端事勢之難便衆願之宜循恐不可以一時銷刻之嫌有所仍置茲以枚舉實狀有此回移必須指一覆稟俾有指揮

嶺南年分狀

本道農形已爲備陳於前後狀 聞今年穡事自春徂夏雨暘調順耕播及時天時人事無甚愆期蓋所以得此豐登之實者專由秧役不失其節六月初二十三日之雨得於庚伏之前奉天乾畚幾皆齊插旣插之後旱魃孔熾山谿諸郡或行祈禱而一日二日其雨不雨一路騷動幾乎判歉者拖至一朔之久矣及七月大水至谿峽之間無不周洽已移之稻次第善遂而最高斤鹵之地終有未足之患朝夕望霓居然失時者間或有之至若浦畚峽田水泥沙覆之年

年恒有者今亦不免早移膏沃之地虫損坐損始雖爲害雨後蘓醒猶能成樣被旱向萎之禾亦不至於全然失手以臣巡路所見言之一望黃雲四野同然而依山之田濱浦之地未免多少沉枯之患谿野之農形各殊高低之成實不同小小災頃邑邑皆有而大凡被災處絕稀免災處甚多苟免於災皆占於豐此所以雖有些少之災不害大同之豐摠而論之可謂近年初有之樂歲從而驗之終是所見少損於所聞至於嶺底數邑之水潦被害海邊諸郡之浸馘所棄及秋食實穗穎零殘而折長補短不甚爲病此固

道內農形之大槩也若又就其中分等而言之則涇  
遜於峽峽勝於野而畚農優於田農田農之中豆太  
最登黍稷唐粟次之木花稍劣然而左右諸郡無甚  
判異田野各穀舉皆均登彼遜此勝不過錙銖之分  
相爲伯仲殆同魯衛之政尤甚名色初無可論只以  
稍實之次開錄于後此又優劣之分等也第念俵災  
之政歉年固難而豐歲亦自不易一有過不及之差  
皆非所以上念國計下恤民隱之道以此思量未敢  
以樂歲之故而少或弛慮旣蒙 朝家過千結劃下  
之數則 恩固至矣惠亦廣矣何敢以加請二字更

事煩瀆而今以臣所目擊叅諸前後邑報繼又分遣  
編裨或周行災處或密探輿論多費斟酌略有尺度  
然後不得不有此 上聞本道幅圓之廣結數之多  
甲於諸路遠而丁丑近而庚戌俱稱無前大有而兩  
年劃下皆近四千結內外今若以得於丁丑庚戌者  
不得於今年則分排磨勘萬無其望惟彼至愚者民  
必將有向隅之歎臣豈敢徒懷嚴畏專事減剋不思  
所以陳聞於初元字恤之下乎臣於事目頒下之前  
別關申飭槩狀報來之後另加查擲凡所操切之方  
靡不用極而畢竟停當之數合爲二千八十五結八



十二負四束元俵灾一千一百結外九百八十五結  
八十二負四束若許加劃則臣謹當略綽塗抹平均  
排比俾無一民白徵之寃他餘條件之可合附陳者  
亦爲後錄馳 啓并乞令廟堂稟旨分付

一居昌寧海俱以不事田農之邑黃豆小豆最爲難  
辦每當捧糴之時輒有遠貿之弊榮川則雖是炭  
邑而小豆本非所尚民人辦納爲弊不此邑報民  
訴皆願變通居昌各衙門黃豆三千三百十四石  
內限一千石作租寧海小豆一百八十七石作太  
榮川小豆三百七十二石作租以爲從土宜辦納

之地至於安義還穀積痼之瘼旣登繡 啓不可  
不另念釐正而米皮各穀其數甚多有難於立談  
間可議裒益爲先租二萬八千五百石內限八千  
五百石移貿於沿邊諸邑徐看來頭事勢以爲次  
次轉貿實爲與受兩便之道迨此年豐并從願許  
施恐合事宜

一山倉設置法意有在儲餉聚戶專爲緩急可恃之  
備而近年以來連值歉荒分數下捧無歲無之故  
不耕不織之民失其聊賴荷擔相續誠非細憂險  
路遠輸之民弊雖不可不念似此豐登之歲若又

復踵前失則甚爲不可今年則叅量折衷平倉移  
捧中三分一許令仍留二分則上捧山倉恐似得  
當恭俟指揮舉行

論船艙狀

今六月二十日到付備邊司關內司 啓辭卽見慶  
尚左水使李元植狀 啓則以爲本營船艙在海門  
十里之地而沙石填塞潮水漸縮淺灘壅流之患月  
異而歲不同若過今年潦水則沙積益高潮不入  
港雖欲移營戰艦兵船運去無路及今變通在所不  
已而機張之武知浦卽該邑戰船所泊處距本府不

過三十里足爲永久藏船之地至於營舍城池地勢  
狹隘無以容設而機張既有城池公解距武知不滿  
五里今若移船艙於武知設營門於邑治則其所增  
衍修補之役隨其緩急次第可圖而財力經費猶勝  
於新設請令廟堂稟處矣該營以海防重地處兩國  
之界所恃而爲用者專係舟師而水路漸遷幾無藏  
船之地者誠爲可悶前後帥臣之屢請移營移船不  
爲無見而營閫移設不輕而重事情形便猶難遥度  
令本道道臣及統制使爛加商度各具意見論理狀  
聞後稟處何如 答曰允傳教內辭意奉審施行事

據今此移營之議其來已久前後帥臣之請不可謂之無意見而往復論難迄未究竟者非以舊艙之姑無通變足可捱過蓋其事巨力綿有難猝乍間設施關到之後第爲往復於統營爛加商確一邊發遣編裨新舊基址詳細摘奸則舊船艙處在兩水合注之交其源甚遠其流甚悍風浪無日不起沙石每年填塞晦望以後潮水淺落則長繫泥沙任其腐敗若當操練之期遠近邑鎮輒有阻滯之患逗遛海上或費數十日內外初非可論於朝發夕至而旣至之後騎船而不能運船水操而便同陸操邊備之踈虞莫此

爲甚新基武知浦距萊府不過三十里左右接應不甚掣碍藏船處所外面驟看則亦頗安穩早晚移設要不出此而但港口東南茫無遮障邑船藏置之所雖有舊築短堤而見今模樣旣不成樣一船所藏之地狹窄已甚議者或以爲依其堤而繼築因其港而加掘則功可省五六而決非長遠可採之論必須截斷海道之或爲一二丈或爲三四丈深處石築六七十把然後可以防風息浪而永久成基不然則初不如不爲之爲愈量其所入物財目下所見當費四五萬金內外此非但褊裨圖形看審之的有所據間多

叩問於隣近邑宰之會見形便者則亦皆一辭無貳而水道工役異於陸地此亦假令而已財愈入而築愈不成則畢竟實入之數亦不可預爲料量而要之有加而無減至於公解營建之費不在此數而已自如此取考康熙年間水營膳錄則舊船艙左邊填沙處防築僅爲三百步而伊時役丁爲三萬三千五百餘名運石船使用爲三百四十三隻物役所入久遠事例雖無可考而推此動民之夥多可驗工費之甚鉅此不過防遮入沙之路而役事尚如是浩汗况此橫截洋中投石成築之地豈合容易商量不念慮始

之道乎舊艙之不可不移旣如彼新基築役之難又如此欲仍置則近於姑息欲移設則此當預有講劃然後方可就緒是爲兩難然而毋論京外凡係變通多有大於此者而拘於事力久未成就者在在何限則此亦財力未區處之前恐難輕議茲以具意見論理馳 啓請令廟堂稟旨分付

啓

上辛祈穀祭用立春前後當否博攷啓

今因禮曹判書閔鍾顯舉條 批旨內祈穀之用立春後上辛禮曹本文文勢似然頗欠分明此所以唐

宋以來有諸儒異同之論而歷代用辛亦各異規者也此一欵非不欲博攷釐正而予意則神之格思在於誠敬不在於立春之前後辛日近於刊冊印行之時亦未釐正者亦此意也然卿之所奏言則有據典禮則所關至重令內閣弘文館博攷以啓後仍令大臣館閣臣獻議本曹指一稟處可也事 命下矣臣等謹按國朝祈穀之禮始於 肅宗大王癸亥因大臣金壽興劄請施行而二十二年正月上辛又行親享禮續五禮儀時日條曰祈穀孟春上辛祭社稷其時只取歲首最上之辛不計立春先後者其所取

捨必有所據而今不可攷矣謹稽古典禮記月令孟春之月是月也天子乃以元日祈穀于上帝鄭玄曰謂以上辛郊祭天也春秋傳郊祀后稷以祈農事是故啓蟄而郊郊而後耕孔穎達曰甲乙丙丁等謂之日郊之用辛云元日郊特牲郊之用辛也言郊不言祈穀此經言祈穀不言郊鄭既以二祭爲一故此註謂以上辛郊祭天也引春秋傳以明之又禮記郊特牲郊之用辛也周之始郊日以至鄭玄曰言日以周郊天之月而至陽氣新用事順之而用辛日此說非也郊天之月日以至魯禮也齊武帝永明元年立春

前郊祀王儉啓云按宋景平元年正月三日辛丑南郊其月十一日立春元嘉十六年正月六日辛未郊其月八日立春此近代明例不以先郊後春爲嫌無煩遷日帝從之梁武帝南郊爲壇正月上辛行事吳操之云啓蟄而郊郊應在立春後何修之云今之郊祀是報前歲之功而祈今年之福故取歲首上辛不拘立春先後宋景德三年陳彭年奏言啓蟄而郊乃三代彝章郊在春前乃後世變禮襲王儉之末議違左氏之明文禮有未安事當從古仍詔有司詳定宋仁宗天禧元年禮儀院言來年正月十七日祈穀前

二日奏告太祖室緣此以正月十五日朝拜王清昭應宮景德四年以前祈穀止用上辛其後用立春後辛日蓋當時未有朝拜宮觀禮王儉啓不以先郊後春爲嫌宋武朝有司奏魏代郊天值雨更用後辛或上辛事有相妨并許互用在於禮典固亦無嫌宋徽宗大觀四年禮局議以立春後上辛祈穀詔以今歲孟春上辛在丑次辛在亥遇丑不祈而祈於亥非禮也乃不果行 皇明初未嘗行祈穀嘉靖十年始以孟春上辛行祈穀禮于大祀殿尋改用驚蟄節十二年驚蟄節命武定侯郭勛代給事中葉洪云祈穀大

報祀名不同郊天一也祖宗無不親郊成化弘治或有故寧展至三月竊念此乃前代已行之例先儒異同之論也互相牴牾莫能合一而其中鄭玄吳操之陳彭年等數說乃主立春後祈穀之論而鄭玄則但從左傳啓蟄而郊一句釋月令則直以祈穀爲郊釋郊特牲則直以周郊爲魯禮夫郊與祈穀祀名既異則乃以其同是祭天而遂爲之一祭未敢知也左氏雖可信郊特牲亦經文則信左氏之過而遂以郊特牲爲非者亦未敢知也吳操之陳彭年則襲左氏鄭氏之餘論而立說也三王郊祀之禮旣未可以鄭註

爲必可從則久遠難稽而有不可質言矣其後諸代之只取歲首上辛不拘立春先後者出於傳紀歷歷如右春後祈穀只宋景德中因陳彭年所請行之而至于天禧旋即仍舊亦不過十餘年間爾魏宋則後辛上辛并許互用 皇明則始用上辛尋改驚蟄此則不特不以先郊後春爲嫌而已歷代典禮之可據者如此矣敢啓

王大妃殿 惠慶宮詣 闕宮行禮時合行儀節  
博攷啓

今因禮曹收議草記本月二十一日 慈殿 慈宮

詣 闕宮時合行儀節有令內閣王署之臣博攷  
王朝禮以聞之 命矣臣等謹已齊會于摛文院取  
諸臣獻議參互較絜則禮曹判書閔鍾顯獻議中  
慈殿行禮當用 先朝臨 廟之禮者最有依據亦  
合朝典 聖批既已許可矣按而行之則有司在臣  
等無容架疊而若我 慈宮行禮時合行儀節則徧  
考歷代禮志及五禮通攷等書并無傍照之的證蓋  
后妃助祭肇見儀禮禕衣褕翟服有其制玉豆眡豆  
薦有其器允爲祀典中一大儀文而漢唐以來斯禮  
之不講久矣况我 慈殿以母后而臨 廟我 慈

宮以齊體而謁 廟斯乃國朝初有之盛典圖頌罕  
覩之微規則文獻之無徵亦其勢宜然也惟 皇明  
嘉靖五年章聖太后有事于興獻廟而章聖太后卽  
興獻之后也萬曆八年帝奉孝定孝安二太后謁昭  
陵而孝定孝安卽昭陵之二后也其時儀注雖不可  
攷而若取諸儒論說之雜出於傳紀者引伸反隅觸  
類比例則亦有可以領略其梗槩者矣謹按圖書集  
成引大政紀云嘉靖五年帝奉太后謁興獻廟諸臣  
引唐開元禮有皇后廟見之儀及國初禮有皇后謁  
太廟內外命婦陪祀之文具儀以上則章聖之於興



獻廟卽用謁太廟之禮不以齊體而略其儀可推而知也又按 皇明萬曆間躬謁陵寢記云萬曆八年帝奉兩宮皇太后率后妃謁永陵入就位女官奏行四拜禮訖奏上香皇太后三上香訖奏復位皇太后跪帝跪於皇太后之左讀祝官讀祝訖奏興四拜次詣昭陵行禮如永陵則孝定孝安之於昭陵亦用謁諸陵之禮不以齊體而降其禮又可推而知 皇明已行之規例宜合引倣於今日臣等愚見則 慈宮行禮時當設拜位於 殿下版位之右稍前而西而出入之由左門陞降之由東階并當一遵明史廟見

之禮至於拜數多寡若依 皇明廟見儀則當行再拜若依 皇明謁陵儀則當行四拜陵廟異禮實難折衷而第伏念古禮男子再拜而以興伏爲拜婦人四拜而以屈膝爲拜婦人之拜謂之夾拜亦稱肅拜士婚禮有婦拜扱地之文周禮九拜有肅拜之名而註云婦人之拜是也據此則 慈宮行禮及 中宮殿行禮并當行四拜禮而邦禮至重不敢質言臣等見識甚淺攷据未確實不勝惶慙之至敢啓

請明正學仍論科試講規啓

臣等以 先朝近臣朝夕香案承聆 玉音每以明

正學爲斥邪術之本萬機之暇課讀五經頌五倫之  
書行鄉飲之禮表章朱夫子書廣布京外學宮又將  
哀輯一統文字用述漳洲故事使一世之人非洙泗  
洛閩之書則毋或寓目而留心此莫非崇獎吾道扶  
植世教俾無陷於匪彝不軌之科與魯聖春秋內修  
外攘之義其揆一也不幸近年以來所謂耶蘇之學  
出自西洋內自京闈外至八域一種不逞之徒相率  
入於無父無君之域惟我先王嘗以此深憂遠慮  
而姑置之不治治之科雖國人皆曰可殺惟天地本  
自好生渠輩若有一分人心宜乎知懼知感革心改

面而忍於仙馭賓天之後妖僭之說肆然無忌王  
府按鞫情節畢露此實天地之大變臣子之同讎國  
有常法妖腰亂領自當次第伏誅而此類之尚梗王  
化卽正學不明之故也欲明正學莫先於招延山林  
宿德之士以爲風動規箴之地雖以我朝故事言  
之中宣孝肅之際羣賢輩出經術大明當時未聞  
有異端邪說之若是猖獗也此實聖祖聲明之化  
而諸先正之功亦不可誣也在外儒臣前雖屢勤敦  
召益加緇衣之誠勉回東岡之志此外經明行修之  
士廣加蒐訪布列朝著使庠塾縫掖之士家朱程而

戶墳典五品修而三綱揭則彼夷狄禽獸之一法特見覘之雪耳且國朝用人專爲科目爲士子者所講所習只一功令文字今欲使一世操觚之人粹棄素業則有非時月間可期依英廟朝已卯定式監試小學庭試增廣一經講自明年復舊設行專尚經學毋循句讀係是目下要道我先朝亦嘗屢詢於筵席未及行焉者也臣等以承聆於先朝者仰誦於今日而事係科制變通伏願下詢大臣處之焉

金陵集卷之六

